

四庫全書

集部

欽定四庫全書

五百家播芳大全文粹卷三上

宋 魏齊賢

葉 菜同輯

表

慰表

慰國哀上皇帝表

司馬溫公

旻天降禍仙馭上賓奉訃哀惶罔知所措伏以太皇太

后作配仁祖聽政英朝洪基所以固安景命由其保佑
風化形於海內德澤結於民心宜永享東朝之尊長膺
天下之養而中壽未至大期有終哀纏兩宮痛決萬彙
恭惟皇帝陛下孝心罔極號慕難居瞻內寢以如存追
慈顏而靡及伏望上為宗廟之重下庇烝民之生少抑
聖情俯就中制臣忝列侍不獲奔赴闕庭瞻望宸極

慰國哀上皇帝表

蘇子瞻

慟發六宮悲纏九土奉諱哀殞不知所云大行皇太后

德冠三朝化行四海獨決大策厝天下於泰山之安退
避東朝復明辟為萬世之法奄終壽祿莫曉天心恭惟
皇帝陛下仁孝自天哀傷過禮惟聖達節豈復行曾閔
之難以民為心則當法舜禹之大願少寬於追慕庶下
荅於臣民臣外郡居住不獲奔赴闕庭

慰國哀上皇帝表

劉忠肅

臣某言伏奉四月一日遺制大行皇帝留位盛時還神
太極詔發一旦哀纏萬方伏惟聖情何可勝處大行皇

帝德蓋上下澤被華夷禮樂文章越四十年治矣政刑
風采曠數百歲無之民方父於至仁天宜予以曼壽宮
車奉諱臣妾無生伏惟皇帝陛下隆孝儲思巨創抱痛
忍革寢門之問勉扶翼室之居唯天性之賢固為哀而
已甚然聖人有制貴循理之大中伏願斷私於情立公
以義對寶命之所屬一羣心而有歸

慰國哀上皇帝表

曾子固

承問震驚失容號慟伏惟太皇太后表儀三世德首於

人倫保佑兩朝功存於王室遽違孝養未究遐齡無間
近疎實均歆慕伏惟皇帝陛下痛貫宸極聖情難居臣
伏限方守印章不獲躬詣闕庭

慰國哀上皇帝表

蘇子由

母儀淪喪率土震驚大行皇太后定策艱難之中力辭
政務之要功存社稷德及生靈奉諱云初痛心罔極伏
惟皇帝陛下以天下為養遽有終身之憂孝愛兼隆
哀慕日遠臣久居謫籍適此召還感恩至深奉慰無路

慰國哀上皇帝表

趙德莊

訃傳朔守痛極天倫餘澤深長函靈摧慕中慰孝慈淵
聖皇帝生知勤儉體備仁明出履多艱蓋天時而非人
事有開再造繫聖德之在民心愴赤水以忘歸望烏號
而無所恭惟皇帝陛下瞻思積久傷怛過宜雖愛自因
心遠紹孔懷之念而功光傳序足歆如在之靈少抑至
情以福方夏臣無任

慰國哀上皇后表

劉忠肅

大行皇帝不天斯民遂仙大駕詔遺無外哀人有生伏
惟聖心何以勝處大行垂今盛德曠古太平大一百歲
之基明而有述享四十年之治安以無誅謂有堯之仁
必有堯之壽豈期一旦忽棄萬方人心畢摧天理孰詰
恭惟太后殿下拱母儀之重扶天德之明義隆三綱位
變一極痛尤先於臣妾哀兩著於國家願少抑於過情
用克全於中制

慰正表

蘇子瞻

嗣歲將興雖有作新之慶舊穀既沒共深追遠之思凡
在照臨舉增懷慕中謝恭惟皇帝陛下道躋堯禹行比
騫參方受圖於三朝明發不寐念御簾於雙日孝思奈
何幸寬罔極之哀少副有生之望臣限以官守不獲躬
詣闕庭

慰冬表

毛伯穎

七日來復三務成功方晷運之迎長增聖情之追遠中謝
恭惟皇帝陛下憂勤嗣服淵默臨朝雲物呈祥慨堯

心之永慕羹牆在望廣舜孝於無疆願抑至懷早摠宿
憤臣以職守在遠不獲瞻望闕庭

慰掩皇堂表

趙承之

臣某言准進奏院今月某日大行皇帝永泰陵掩皇堂
者因山成禮復土告期音容莫追號慕永絕中慰恭惟
皇帝陛下痛貫宸極聖情難居臣以守職在遠不獲奔
赴闕庭臣無任悲慟隕越屏營之至謹奉表陳慰以聞

慰山陵禮畢表

王介甫

須百祀之材已襄葬故設九虞之主方考祔儀伏惟皇
帝陛下德懋欽明道隆勤孝雖送終之禮已備而追遠
之念甫深惟順變以抑哀實含生之至願臣限分鎮守
阻預班朝

慰山陵禮畢表

宮車云迈陵邑既營凡在照臨豈勝摧慕伏惟太皇太
后道侔坤育仁出天成永懷愛孝之隆尤積悲恫之感
稍舒慈念實慰輿情臣叨備從官限分符守徒有扳號

之至痛恨無辨護之微勞

慰祔廟表

七月而葬既克奉於寢園萬世不祧遂崇成於廟室凡
居覆燾同盡扳號伏惟皇帝陛下膺保聖神踐行仁孝
纏哀固極率禮無違仙游既集於宗祊聖念彌勤於翼
室仰祈順變俯睠含生臣符守所櫻班朝莫預

慰祔廟表

威靈有集方祔於廟祧感慕無窮外覃於蠻貊伏惟太

后比賢任如纘慶塗莘祇協孫謀克襄大事地非蒼梧之遠勢有霸陵之安唯割至哀尚膺遐福臣備官有守奔問無階

慰祔廟表

趙承之

臣某言伏準進奏院報今月某日哲宗謚號皇帝神主祔廟禮畢者易奠以虞既備送終之禮寧神於廟益增如在之儀凡在照臨詎勝感慕臣某恭以哲宗謚號皇帝道存撫御躬致憂勤念甫門於玉衣遽永藏於宗祏

伏惟皇帝陛下孝深罔極痛切因心願少抑於聖衷庶
大安於民望臣以守職在遠不獲躬詣闕庭

慰申王薨表

歐陽永叔

伏以申王德文位崇王爵地重宗藩遽背明時奄然殂
謝恭惟皇帝陛下仁親九族孝治萬方成服發哀恩隆
禮備臣忝居侍從遠守詔條不獲躬詣闕庭以申奠慰
慰鄂王薨表

宋子京

皇閭纏哀慶芝掩秀訃傳中夏慘結羣心中謝恭以皇

子鄂王生賦敏齊日升令秀弗俟祿教自凝天資已疏
采於朱維方竚華於蒼震而霄寓生沴星躔隱暉休精
上還翼子中奪伏惟皇帝陛下念深祀鬯愜結睿衿徒
重軒渠之憐靡逮溫文之就天壽有底悲傷奈何伏望
推理於難堪割慈於無益漸平哽惻專育粹純況宗稷
流光春秋鼎茂已告功於晏晏方受報於繩繩今此悼
懷幸寬至愛臣限分符第方隔禁聯憂悃飛馳臨文悵
塞

乞聽斷表

皇天降罰慈及上賓孝思通貫於宸衷號慕忍違於哀
次敢即道揚之命祈從聽斷之權陛下誠格兩儀行高
百代久以天下之養娛於太上之尊忽大故之非常實
有邦之不幸嫫嫫在疚聖情深罔極之思瞿瞿如求至
性越有餘之戚臣心震懼國事浩繁爰指掌故之儀宜
反宅憂之位伏望禮存中制喪抑過哀服成三日之餘
暫回幄殿躬攬萬幾之外時奉總筵庶俯慰於羣心亦

仰承於遺詔

乞聽斷表

冒貢封章懇祈臨政皇情深惻詔旨弗俞洊申迫切之誠冀動崇高之聽竊以天子之孝異乎匹夫聖人之心先於達節雖在諒陰之戚亦思付托之艱俯以從權勉而決事陛下道兼倫制性盡愛欽慈庭初爽於豫和鑒輅益加於定省不脫冠帶憂勤備罄於武王如見羹牆號泣遽終於舜帝宮闈感慟朝野哀摧仰知孝慕之無

窮伏念卹章之有紀矧此遺留之訓具存聽覽之期願
敕乘輿姑還翼室學音而臨殿中自有於漢儀作命以
王言下庶承於商令茲為順變望賜矜從

乞聽斷表

喪無二事禮有從權瀝血書辭既竭愚誠之髦髦倮躬
拜命未回聖孝之皇皇上念邦家之閔憂次慮軍國之
重大敢陳三瀆庶望兩全仰惟慈皇新棄至養寢門近
止思問膳以無因前殿歸然欲奉卮其何及此淵衷不

堪於哀痛而庶政奚暇於統臨然而道貴適中孝先繼志若稽前代參考本朝行宮中三年之喪自應古誼決天下萬微之務皆徇時宜陛下德並重華義殊訪落朝於未央者二十六載亘古所無慶於德壽者八十一秋在今何憾願體付託得人之訓深裁悲憂過制之情趣素幄以還宮御清廂而聽事銜報之所莫大於斯

乞聽斷表

伏讀訓辭未親政事再命三命而俯僂何敢瀆煩一日

二日之幾微豈容但已臣聞自周而上何必高宗之諒
陰由漢以來遂有文帝之制度雖云易月之令不廢終
身之憂徒以門內之恩特為天下而屈陛下受天至性
執古通喪率禮無違慕親罔極齊疏之文饘粥之食皆
與下同顏色之戚哭泣之哀獨由中發茲誠創鉅而痛
甚然念業大而事叢苟循三年之不言曷俾百官之承
式載惟歷世之主率用權時之宜非不知行道之人皆
弗忍也蓋亦本先王之制俯而就之陛下酌祖宗之常

行為社稷之大計駕還廣內豈必日見於羣臣國有煩
機姑念躬裁於急務別遵彛典請聽視朝

乞聽斷表

孝大憂深情難抑奪誠微詞淺意未宣通呼天號鳴無
地隕越本廟恤典具垂列聖之規太上仙游預播大行
之旨今啟請悲出尊承惟是北宮遠於南內方仰倚廬
之慕敢祈行殿之還第緣機務曠弛之多且復宿衛暴
露之久今則叢塗已畢練祭繼陳儻為大政而暫回則

於孝治而無闕伏望痛裁哀毀深念艱難體我皇兄親授神器尚虞國事妨於五日一朝之中豈欲邦彞廢於千秋萬歲之後唯勤愛日之事實慰在天之靈矢詞已窮得請迺止

乞御正殿表

永言孝思勉即西廂之決率循大辨當臨南面之期敢冒威尊敬陳悃悞陛下以堯為父盡舜事親久依黃屋之悲忽愴白雲之儼儼然經杖雖更練祭而弗除潛然

涕洟每念大恩之難報間從素幄廷對輔臣急先之務
所必聞極辨之儀所未暇在廷百職稽首一詞謂天固
不言而四時行然辰必居所而衆星拱直臨端序庶慰
羣情伏望順變節哀體元居正與其具禮閨門之內不
忍斷恩孰若事親法宮之中允為繼志願垂俞旨早復
曩章

乞御正殿表

國遭變禮已用易月之期朝有常儀未舉答陽之義懇

祈莫遂震惕靡遑伏窺上古之遺書備著成周之恤典
延之翼室具嚴臣子之宅憂出在應門登進公侯而聽
命茲為萬世之法則蓋得一時之經權陛下執古御今
因親致孝復先王之制異武帝之空言執君子之喪過
曾參之實行自經晁練合視昕朝方且皇皇於哀經之
中何暇穆穆於巖廊之上迨更祥禪已盡情文哀已極
於其餘過將猶於不及願稽中德曲徇下情負宸而位
明堂時俯臨於百辟釋冕而反喪服內自致於三年率

由雋章用答光訓

乞御正殿表

喪期有數當御外朝孝慕無窮尚堅中詔惟主明以理
可奪蓋天高其聽甚卑敢暨百寮躬冒再三之瀆冀從
九陛日瞻咫尺之威竊惟古禮之難行蓋以後王之多
事若五月居廬而戒命未有或三祀諒陰而恭默不言
則必上廢朝廷之儀何由下臨軍國之務是以歷代皆
從權宜迨至我朝始參故實外循易月之令內盡通喪

之情然而成服以還亦勉親於庶政既練之後乃延見於羣臣陛下欲重報於先皇悲增隆於舊制自我作古蓋將垂法於百王示民有終豈特加人之一等願遵彝典少抑至懷亟發綸言尊臨黼座宅中立極達孝全於武王四方來觀同心戴於舜帝

辭免表

儲君

辭陞儲表

代

晏元獻

臣某言伏覩內降制書以臣為皇太子者初聞中旨但集於悚兢退省孱資不遑於寧處敢陳丹赤上瀆威顏臣某中謝臣聞易象垂文戒立身之非據聖人數化貴

育物之得宜小言而大祿者猶謂冒居德薄而位尊者孰允公議而況元良之建盛典素隆震豫離明載前聞於八象星暉海潤昭茂盛於兩儀必英譽之有聞則具瞻而期協伏念臣性惟庸昧識謝周通毓質天庭幸依於累善蒙榮霄極豈著於盛猷恭惟尊號皇帝陛下受

命紫清集符溫洛協三靈之丕祐臻萬國之同和乃眷
本支薦加寵秩而自啓封淮甸胙土江吳列尹正之崇
資陟盤維之峻級兩宮視膳日奉慈嚴六學傳經時親
典誥喜因心而盡禮覃樂思以知新漸冀組修用符訓
導敢謂宸襟過聽綸詔忽頒將闕儲闈俾膺睿渥側聆
布告增惕神魂覲眉目以何施蹈冰淵而靡措蓋念邦
家名器詎可以忝塵君父生成諒垂於保庇倘徽恩之
驟及諒頑鄙以曷勝矧在幼冲方期勗勵將何以雍雍

崔禁表貳桂宮翊贊嘉謨遙卜壽街之牘詳求多士旁
延望苑之賓虔仰昊穹載陳悃悃伏望陛下軫彌高之
聖念推善貸之深仁察以妙齡蓋非飾讓寢茲茂式協
乃慎徽則赫赫昌朝咸契大中之化區區積質俯安若
厲之誠冒昧自陳期於得請

辭陞儲表代

晏元獻

臣某言臣自沐徽章再陳封奏至誠雖竭而宸聽未迴
仰批諭之猥臨積兢慚而非據臣某中謝伏以量力度

德立身之格言授才任能有國之通制而況明離著象
蒼震垂文聿崇守器之規仰協重輪之詠必資盛德用
贊大猷伏念臣植性迂疎秉心蒙滯萬期嘉惠託層漢
之靈源千載昌辰何慶雲之洪陰伏惟尊號皇帝陛下
纂承真系茂闡丕圖泥金薦禮於蒼旻錫壤推仁於宗
緒上公進秩半楚疏封俾陟上庠欽聞雅誥眷言吳會
薦啟藩維漢節誕頒夏璜昭錫奉日嚴於溫清慕時習
於緇紉居業寡聞冒榮為愧遽荷紫清之命越升儲兩

之崇風旨乍聆神魂增駭疊陳丹款願寢洪私天監彌
高綸言益厚氷淵自處彌劇於九回肺腑虔祈難逃於
三瀆伏望陛下廣至仁之茂育推妙道之善成俯降堯
曦旁回禹律特收渙汗爰示於撫臨冀自踰涯庶安於
庸陋由衷所極得請為期

宰相

辭免左丞相進封許國公表

周益公

登備鼎司久當策勉晉持魁枋倏奉庭揚籲天申不稱

之詞伏地拜弗俞之詔鴻私溥博孤跡凌兢

中謝臣聞

受才有洪纖賦質有良窳扶明堂者資梁棟安用條枚
薦清廟者須鼎彝寧參瓦礫力不勝任人將汝瑕伏念
臣根闌材微斗筭器小際會光華之旦追陪寅亮之揆
罪功宜詔賞誅漫無可否賢邪當明黜陟殊惜抑揚觀
已事之如斯豈後圖之足責敢謂羣賢之進遽叨上宰
之除有次輔雖不備官理也何損無成勞亦令賜位臣
也胡顏為國計以牢辭非身謀之獨審伏望皇帝陛下

謹於圖任監乃知難外求巖穴之英內選朝廷之雋俾
居三事庸長百寮遜於爰斯伯與敢忘稽首有若閔天
號叔尚助迪威從治之仁鞠躬以俟

辭免左丞相進封許國公表

周益公

銀臺入奏力辭揆端之崇鸞驚批章特垂王人之重雖
貪承命抑懼瘵官敬陳確至之言疊冒穹隆之聽臣

中

謝

臣聞位高者智愚難掩任久者賞罰易行九載之績
不成當從絲殛三考之明勿涉孰底舜功如臣無堪被

遇最早越次嚴徐之列進陪夔契之遊碌碌政塗殆彌
數歲容容宰路仍陟再朞論其時則已多責其效則何
有未能引去亟俟伏歸今乃位充元輔之久虛秩序文
階之一品既殊試可更異黜幽況故官不許復居而新
渥又為非據進退交違於小誤勸懲有累於大公伏望
皇帝陛下旁燭忱恂數求俊傑貸妨賢之往咎審佐聖
之良圖謂如髮之引千鈞其誰云可因循牆而起三命
亟報曰俞忱辭已竭於肺肝察允尚收於綸綍

辭免丞相表代

張文潛

不俟駕行既已驅馳而至疇若予采復膺考慎之求在
明王圖舊之意則深於愚臣陳力之義則過

中謝

伏以

二聖求治歷年於茲忠厚之澤足以傳之無窮仁孝之
誠固已格於上帝守此成憲底於太平加以左右輔弼
之臣蓋極老成俊乂之選何圖次輔之虛位乃復召臣
於守藩茲蓋伏遇皇帝陛下廣度兼收至明洞照察其
疲駑之不逮出於悃悞之無他意其先之教忠或恐老而

更事責以來效用之不疑上副眷求敢愛竭盡而臣伏
自深念固非飾辭形骸已衰心力隨耗雖輔相重任不
欲舍其舊而新圖然衰疾交攻豈期老將至而髦及雖
至仁之曲被顧公議之謂何天下豈無巖穴之賢朝廷
不乏公輔之彥與之圖國足以格天而臣已試之効可
知將老之誠彌切不能就列敢辭避於再三因是得人
功猶期於萬一

辭免右丞相表

政地充員未即國公之譴昕庭出命忽陞次輔之聯念
甫控於危衷莫遽回於淵聽寵非素望義合終辭臣中

謝臣聞人主之職論相以為先邦家之基得人而後立
上稽於帝下逮有唐或都俞吁咈以成謨或輔贊彌縫
而藏用皆極天下之選用圖治績之熙爰及皇家益難
柄任求諸人望不猶愈於商周播及聲詩又何殊於夔
契中興而後鉅公相望間關成祀夏之功左右大格天
之烈書於簡冊光若日星仰惟責實之朝尤謹疇咨之

始未聞僥冒有若疎愚小有材而登廟堂奚堪任重遠
無慮而籌帷幄烏可責成伏望皇帝陛下大廓皇明深
為國計奮庸而宅百揆宜先四岳之詢寅亮而弼一人
當遴二公之選不容輕授庶協公言

辭免右丞相表

劉丞相

制麻初下既陳控免之章詔綍屢頒未拜允俞之命敢
再三而懇請冀萬一之聽從中謝竊惟宰司左右之聯
均任天下安危之寄官非必備才必求全如傳說作相

於商宗獨員而自足召公為保於周后並用以相維要在得人俱能底績有如臣初知末學恪守愚忠識不足以達夫事機謀不足以斷夫國論在於進退何有重輕矧惟當軸之元臣早負濟時之遠略克當倚任豈假疎庸伏望皇帝陛下念擇相之維艱於掄材而加選元首喜而股肱起願持不息之誠應龍升而雲霧興當得非常之佐共成大業永底丕平毋懷反汗之小嫌庶定保邦之大計

辭免右僕射表

劉革老

揆席久虛治庭敷號猥及非才之錄大驚羣聽之公敢

冒至恩輒忘素守臣

中謝

竊以論相雖人主之職得賢

乃太平之基必先全德之老成或待遠方之持起伏念

臣本由疎賤叨寘顯嚴備數而臣或進帝王之說與聞

夫政顧慙禮樂之文堯作章而既成漢分符以方重謂

且簡斥更辱延登夫褒德者天下之大公而竭節者人

臣之常分念早塵於機要已久席於高華奚事屢遷乃

能畢力威名匪重將取侮於四夷智略更疏無可言之
十事苟從昧進曷慰具瞻倘選於衆而求之多出於臣
之右者伏望慎名與器以尊朝廷詔德選勞以勸臣下
俛徇富平之請曲成考父之銘收回綸恩庶允清議

辭免右僕射表

敷告以庭疇咨以位惕然驚汗浹於媿顏

中謝

竊以師

長百司位隆於端揆權輿大政地重於西臺進德則朝
廷尊當賢則臣下服而臣學不足以斷國論才不足以

達事權辜奉恩私坐稽歲月處非其據者已久受過其量
而莫勝方與引分之言冀逭妨賢之責敢期函垢更使
代工倘懷苟得之圖妄作自賢之行公器不嫌於多取
豈曰知難高位必致於疾顛安能圖報上則詒盛朝之
累下則躡衆正之賢伏望別擇皋夔改圖丙魏登寘宰
路使東國成大明庶物之情不奪匹夫之志還收渙渥
以息煩言

辭免右僕射表

劉莘老

微志未伸誠言難止倘或安於名分其敢違於典刑中

謝

恭以國家之輔相難其人臣子之進退必以道蓋治
忽之所由繫而榮辱之於是生臣遭會四朝周旋三禁
感慨忠義常見古人白璧不為之非風采功名媿之大
臣巖石具瞻之望略無報効久俟譴訶詎聞猶告之音
擢真宰司之重力不勝任實憂代斲之必傷樞而升高
將有指頂而見笑下招覆餗之辱上玷知人之明況有
廟堂之耆明而多中外之俊乂改疇公望乃協師言伏

望昭鑒至誠保全晚節使器盈者不至於溢弱植者亦足以支持反誤知庶無虛授

辭免僕射表

王介甫

賞典越踰訓辭稠疊渙汗所被是為至榮朽材難勝更以多懼輒輸危悃敢冒威尊中謝竊以左相位崇東臺

地要雖置員而久曠蓋受任之常難臣晚值聖時久妨賢路奉揚成命螽力困於負山數釋微言螽知窮於測海方譴訶之為畏豈寵獎之敢圖忽此兼叨夙無前比

深惟淺薄仰累休明伏望聖慈俯照愚款斷從公論追寢誤恩豈惟私義之獲安實亦物情之歸允

辭免僕射表

恩言狎至鄙守難移敢冒德威更陳私義

中謝

竊以高

秩厚禮以酬莫盛之勲勞綿力薄材豈稱非常之爵寵人之所畏物有固然臣誼行見知而涉世多為衆毀論材受任而居官無以自昭惟屈首受書幾至殘生傷性逮承聖問乃知北海之難窮比釋微言更悟南箕之無實

疏榮特異揣分非宜苟叨昧以自安懼譴尤之隨至伏
望皇帝陛下俯矜危拙曲賜全安不以反汗之小嫌為
能累國則是捐軀之大節實在報君

參政

辭免參知政事表

官高祿厚誰不願居才薄力綿自知弗稱輒布由衷之
悃薦干難犯之威臣

中謝

伏念臣起於寒鄉適際興運

樸忠自信介立無聞靜惟一紀之叨踰悉出九重之簡記

方從帥閫復上禁塗越月通班未効微勞之補自天出
綽遽容國論之陪矧當政刑閒暇之期尤重股肱忠力
之寄豈同他職或許竊居既據蒞以知危敢循牆而力避
伏望皇帝陛下圖內外之無患合后臣之克艱博選真
才以當隆委收誤加之雜渥亟賜俞音俾無侶之孤踪
復安舊著陳辭既竭得請尤榮

辭免參知政事表

歐陽永叔

職參論道宜極選於一時授匪其人實駭聞於衆聽恩

榮所被跼蹐難安中謝伏念臣本乏材能徒緣幸會列
於侍從白首無聞置在樞衡素飡已甚雖聖主之恩天
地曲示含容而朝廷之事毫釐動關利害豈止曠官之
誚每懷誤國之憂矧惟政事之臣實代天工之任俾之贊
貳宜擇材賢伏望皇帝陛下收誤獎之恩廣僉諧之訪
憫疲駑之已試備見無庸求俊又於在庭擢之不次俾
獲安於舊職冀免速於罪辜報效之誠捐糜後已

辭免參知政事表

王介甫

才薄望輕恩隆責重敢緣聰聰冒進忱辭

中謝

竊以建

用宗工與圖大政以人賢否為世盛衰矧休運之有開
須偉材而為輔豈容虛受以誤明揚如臣者承學未優
知方猶晚先朝備位每懷竊食之慙故里服喪重因采
薪之疾陛下紹膺皇統俯記孤忠付之方面之權還之
禁林之地固以人言之可畏豈云國論之敢知忽被寵
臨滋懷愧恐伏望陛下考慎所與燭知不能許還謬恩
以允公議庶少安於鄙分無或累於聖時

樞密

辭免樞密表

葛謏白

擢預斗樞揆瑣材而弗稱冒干天聽冀成渙之復回仰
勤溫詔之頒尚覺俞音之閔敢殫愚悃薦瀆聽聞臣中
謝伏念臣世受國恩身逢聖旦擢第於隆興之初載入
朝於淳熙之二年徧塵清切之班盡出生成之造禁塗
入告尚無以効千慮一得之愚宥命所基豈足以贊三
軍五兵之運當聖神之在御值邊境之無虞尤資克壯

之猷以歷未形之患況宰執之並命聳兵民之具瞻豈
緊妄庸亦叨東拔念公言之可畏顧私義之未安班著
之峻則有非據之憂家諱之嫌則有冒容之媿進退維
谷偃僂循牆倘貪得而弗思殆疾顛之是懼伏望皇帝
陛下仁天洪覆智日薄臨謂股肱開國體之崇豈宜輕
授察斗筭非器量之大必至易盈追還已漫之恩益盡至
公之選臣無任

辭免樞密表

汪彥章

入參朝算方俟黜幽進長樞庭更叨圖舊仰荷褒揚之
過實深盈滿之憂敢布腹心仰干旒冕中謝竊以聖主
之用人也必量其材之所至忠臣之事上也先度其力
之所宜故為之上者靡傷知人之明為之下者得逃曠
職之累一失此道兩乖厥宜如臣者初乏經綸特緣遭
遇二紀服周行之末一朝居多士之先昨叨近弼之除
已過平生之望豈有方更於晦朔居然躡次於鈞衡雖
至無知敢忘自揆伏望皇帝陛下以隆施寬物以獨斷

馭臣知愚誠蓋出於由衷於成命不嫌於反汗別求賢佐共圖宏濟之功毋使孤踪益重疾顛之禍

辭免樞副表

歐陽永叔


成命始行驟驚於衆聽撫心增懼莫能以自容

中謝竊

以樞要之司朝廷慎選出納惟允實贊於萬幾禮遇均隆號稱於二府顧任人之得失常係國之重輕苟非其材所損不一伏念臣器能甚薄風力不强少喜文辭殆浮華而少實晚勤古學終迂濶以自愚而自遭逢聖明

擢在侍從間嘗論天下之事言出而衆怨已歸思欲報
人主之知智短而萬分無補徒措危躬於禍咎每煩聖
造之保全既不適於時宜惟可置之閑處故自叨還禁
署逮此七年屢乞方州幾於十請瀝愚誠而懇至被明
詔之丁寧雖大度并包猥荷優容之賜而羣賢在列
敢懷希進之心茲蓋伏遇皇帝陛下急於求人思以濟
治因柄臣之並選憐舊物以不遺然而致遠之難力不
勝者必速其覆量才不可能自知者猶得為明敢冀睿

慈答其迫切俾回渙渥更選雋良如此則器不假人各
識賢愚之分物皆知報何勝犬馬之心



五百家播芳大全文粹卷三上

欽定四庫全書

集部

五百家播芳大全文粹卷三
中下

詳校官編修臣謝振定

助教臣常循覆勘

總校官編修臣王燕緒

校對官中書臣范鏊

謄錄監生臣周炯

欽定四庫全書

五百家播芳大全文粹卷三中

宋

魏齊賢

葉芬同輯

辭免表

郡王

司空

使相

昭文相公 大

資

辭免進封郡王表代

曾子固

寵踰於德愧甚於榮輒露危誠仰干睿聽

中謝

竊以袞

衣備物禮均上宰之崇土宇分封位列真王之貴非智
能足以謀國勞烈足以及人屬在休明詎容玷冒若臣
者侗然固陋眇爾穉蒙雖甫逮勝衣習為容於趨拜而
方思就傳賴齒學之漸磨庶幾識古今之通方知國家
之大體施於為已可以持循必也當官覲無違曠已叨
分於將鉞復誤假於公主虛冒洪私未申薄効敢圖獎
渥薦及謗微視儀數於三台超爵名於五等既加真食

仍益爰田固非錄善而量能又異校勞而數最將安稱
此自顧缺然而況皇帝陛下處父子之間常先義訓在
君臣之際每徇公言伏望察臣精懇之由中不顧小嫌
之反汗許還新命俯遂微情使臣得奉定省於晨昏稍
安幼志報生成於天地更待壯年

辭免司空表

王介甫

隆施所逮懇辭勿俞輒冒天威更輸微款

中謝

臣事勞

無紀操行不修居竊萬鍾初未知於辭富坐彌九載方

欽定四庫全書

五百家備芳大全文粹
卷三中

二

有俟於黜幽豈圖邦命之新尚眷求人之舊寵靈覃被
危厲增加位高疾顛力少任重實前修之切戒敢小醜
之冒膺仰冀睿明顧憐衰朽改茲非服免貽官謗之憂
宥以罔功使獲里居之佚臣無任

辭免使相表

王介甫

恩典有加事勞弗稱陳力沉難於黽勉輸情終冀於矜
哀中謝伏念臣晚出窮鄉首陪興運恕心量已雖知容
膝之易安營職趨時更似絕筋而稱力既及眊衰而成

疾重遭憂釁以傷生姑欲補完唯當休惕若任州藩之
寄仍兼將相之崇是為擇地以自營非復籲天之素志
伏望皇帝陛下追還渙號俯遂愚衷許守本官退依先
壘倘憐積歲參大議於廣朝或賜誤恩食舊勞於外觀
尚繫眷獎非敢干祈臣無任

辭免使相表

王介甫

以病自陳庶全於私分蒙恩幸許尚切於隆名淪肌雖
荷於優容省已終難於叨昧輒披情素上冒聰聞

中謝

欽定四庫全書

五百家備芳大全文粹
卷三中

三

伏念臣久玷近司迄無明效終蒙解免實賴保全自顧
衰骸已難勝於勞勩數違明詔實仰冀於矜憐號兼將
相之崇身就里閭之逸誤恩若此前載所無非惟私義
之難安固亦公論之弗與伏望皇帝陛下深垂簡照俯
徇虔祈特回渙號之已孚許以本官而充使如此則上
足以成陛下徇名之政下足以免愚臣冒寵之慚

辭免使相表

愚誠屢瀆方負憂兢聖聽未移更加獎勵故仰聞於國

體敢終冒於天威中謝伏念臣頃汙近司久虛大受晚
罹疾疢自當辭祿而里居尚恃眷憐故敢祈恩而家食
將相之為重寄朝野之所具瞻若免於事任之勞而尸
此名器之寵在昔之茂勲明德尚莫敢居如臣之綿力
薄材豈宜非據伏望皇帝陛下俯矜危懇追寢誤恩豈
惟私義之所安是固物情之衆允

辭免昭文相公表

為君所艱尤謹厥與命相不善將壞於成矧當責實之

時敢替知難之義

中謝

臣知不足以及遠學不足以窮

深比誤國恩嘗尸宰事初無薄效稱萬一之褒揚止有多言煩再三之辨釋終逃譴負實賴保全恭惟皇帝陛下若古以堯之欽明御今以禹之勤儉矜修積美山無一簣之虧因任致隆臺有九層之累小大祇若遐邇允懷畬而不菑雖或許其繼事灌以既雨豈不昧於知時況惟疲曳之餘過重休明之累且用人而過矣固不免於敗材苟改命而當焉亦何嫌於反汗敢期聖哲俯亮

愚忠

辭免資政殿大學士表

錢參政

自天有命無地措躬伏念臣濫厠班行驟膺識擢躡登
樞筦參預政機感超異之遭逢思糜捐而稱塞歲時更
厯天日照臨因造膝之敷陳露乞骸之懇請仰戴慈憐
之厚曲彰覆護之深昭示隆私寵頒異數力辭得獲微
力少安席未煖於里閭詔促臨於藩屏南徐効力初靡
著於顯庸北闕疏恩已復加於美職深惟忝竊倍劇凌

兢敢圖簡記之隆更付保釐之託守籥再經於眷首撫
封常勵於夙心罄殫朝暮之微勞酬答乾坤之大造十
連無事實自廟謨庶政罔功方憂吏責退欲伸於前牘
進忽奉於除書名升規殿之新寵命渙帝綸之舊恩遇
誠厚矣臣實懼焉伏望皇帝陛下廓淵聽以下臨鑒愚
衷之上達使遂終辭之志不嫌申命之回得請為期俯
躬以俟

辭免資政殿大學士表

恭馳牘奏已罄臣衷敬拜璽封未蒙帝可再陳悃悞重
犯威尊竊以敬邃宇以崇儒自本朝之建立褒異庸而
賜職乃今日之舉行與既不輕得而為貴因殿額榜題
之差次序臣鄰班立之後先既列綴以冒居復階升而
序進疾而恐躡退則能安伏念臣濃受恩知恨無報効
重膺委寄思有微勞雖食息之靡遑勤而無補況精神
之易竭力則難勝眷東西府境之連萃南北均屯之衆
兵民雜處農賈萃區貴慈惠以撫循要威名而彈壓藉

九重之覆若幸數載以安然毫釐莫積於事功方寸但思於田里寂爾二邦之績穹然兩殿之華循名既高責實甚淺必難虛受是敢固辭伏望皇帝陛下照懇避之忱誠賜收還之詔旨施於有政既資助之無聞必也正名恐祇承而弗副瀆煩冒昧戰越驚惶

門下侍郎 左右丞 起居舍人 更侍

史官

辭免門下侍郎表

劉革老

發政西臺無裨於聖治陞班東省忽霈於恩書揣分未
安控詞自列中謝惟先王制爵祿之等以待賢能而君
子謹進退之方必循理義臣起於寒晚躡至顯嚴獨特
聖明特達之知不緣黨友更相之助虛塵近輔更涉累
年愚而直者人情之易睽公而固者衆怨之所聚每幸
曲蒙於善貸保此孤危豈敢更冒於誤恩遷其位秩上
乖朝廷黜幽陟明之典下負臣子見得忘義之譏伏望
太皇太后陛下謹名器以申大公明勸懲以勵百辟收

還成命改受有勞臣無任

辭免門下侍郎表

劉莘老

勞能不聞階品益進俱必投於顛仆敢冒貢於誠情

中

謝臣進德不强造道甚淺逡巡尺寸之守遭會聖神之
知少負丘山莫報之恩初無絲毫可紀之善粵參大政
及今驟至於四遷升賓東臺所歷遂周於三省益高股
肱之任況備喉舌之司爵視上公邑增真食倘罔功而
濫處實累國以起羞伏望皇帝陛下如日燭幽體天成

物察臣表裏之既盡矜臣器量之已盈特收誤恩以允清議

辭免門下侍郎表

蘇子由

久塵右轄無補於時進貳東臺有慙在列言莫宣於誠意聽未感於高明

中謝

伏念臣頃以虛名誤蒙收錄旋

塵近侍非有勞能咀嚼文詞本腐儒之事業彈治邪枉犯衆口之憎嫌及夫進貳文昌日侍軒闥隨衆出入得失何補於萬幾奉行文書勉強自慙者期歲此則聖主

之所親見孤臣之所自知豈待人言難逃天鑒敢謂超升累級復進崇階雜用負乘行自招於寇盜未嘗狩獵食何取於鶉鴝伏望太皇太后陛下因功以舉賢選衆以拔士采其譽者必考其實聽其言者皆原其心如臣空疎自難隱伏特追成命以慰公言使聖朝無失於用人則臣愚若蒙於厚賜

辭免門下侍郎表

喉吻之任密侍於禁中綸綍之行風傳於海內苟用人

之失當於累上以非輕

中謝

伏念臣西南陋儒墳史樸

學非有過人之大節惟守事君之小心無其實不敢居
其名非其任不敢竊其祿仕歷三世年逾半生奉以周
旋未始非墜今者乃欲以尋尺之材居棟梁之任以斗
升之量受鍾鼎之藏雖欲欺君且非本志矧復躡等超
累級之上遷秩非舊比之常靖言以思未見其可伏望
皇帝陛下因任庶物照臨百官短長各盡其宜大小無
失所養必其力有餘而後用則其任逾久而常新抑將

多士皆賴以安豈惟微臣獨被其賜愚衷已竭天聽尚
回

辭免尚書左丞表

劉莘老

竊以國之爵祿以待賢能士之進退必循名義或有異
此何以示民

中謝

伏念臣綿力薄材至愚極陋比蒙誤

寵擢備近司之宏遠之規模空銷疲於精銳未嘗小補
方俟大訶敢期恩憐更進位序考其歲月則既非久次
課其職業則又無顯勞倘輒冒居實干清議伏望皇帝

陛下慎名器以厲在位明是非以正其功深察誠言許
仲愚分無難反汗之命庶拯臨淵之憂

辭免尚書右丞表

蘇子由

臺轄之重國論所存顧惟尺寸之材何與棟梁之選比
陳誠懇尚秘俞音中謝伏念臣家世寒儒僅守父兄之
樸學文史末技不通邦國之大猷頃自元祐之初偶緣
乏使召自南遷之後遽責使言旋由左史而踐掖垣復
從右戶以居翰苑迨茲執法曾未數年言何補於聖明

志已殫於憂責以一日遭逢之幸擅諸臣積累之榮方
懷滿溢之虞願求閑散之便豈意思私之橫被復叨承
轄之近班自昔政事之臣非處書生之地既犯不韙其
何敢安伏望皇帝陛下以德愛人量材付位深察斗筭
之陋難堪鍾鼎之華追還誤恩選建明德俾賢愚各安
其所則中外無復間言其於微臣受賜多矣

辭免起居舍人表

張文潛

言動之職最近清光儒學之臣以為榮選臣孤生晚進

駑散薄材擢自選人寘之太學復天祿石渠之職首預
選掄紬金匱玉版之書兩領著作功能何有屏退所甘
加以冒昧史官頗縻歲月論次故事未就簡編何有賢
勞遽叨獎擢浸階華近入侍禁嚴內循弱植之易搖實
懼多言之可畏敢傾誠懇祈止誤恩免進顛躋更累樂育

辭免吏部侍郎表

邵公濟

聞命震驚罔知所措中謝竊以從橐清職賴獻納之忠
規銓衡劇曹資疏通之藻鑑欲當此選宜得其人如臣

涉學匪優賦資甚褊誤叨睿擢進陟臺端雖言聽諫從
每蒙於睿獎而力綿責重實懼於顛隲自知無補於涓
埃方欲退安於閒散豈期庸陋忽玷遷除仰丐皇朝追
還渙汗別東求於時彥用少慰於輿情

辭免史官表

秦少游

史屬之除聖朝所慎若非承父兄之教詔世守其官則
必積師友之淵源材充厥職臣於二者實無一堪聞命
若驚撫躬增懼重念臣少而愚賤長更屯奇積累歲時

尚慮人情之未與超踰近分豈為物議之所容以蕞爾
不勝任之材處灼然非所居之地必招官謗上累恩私
況儒館之中資任高於臣者不少班行以內學術過於
臣者甚多與其容菲薄以濫居不若擇英豪而改授伏
望聖慈追寢前命

三司使

節度使

都督

帥府

辭免權三司使表

蔡君謨

地親任重寵數殊優資薄才微公議非允

中謝伏念臣

向由樞職出治泉山奉高年之慈親許還養於舊里昨
承詔旨還京屢降德音不容讓免驅馳百舍之遠趨伏
九閭之嚴曾未達於近畿復遷處於大計天下通流之
術非小智可以營為禁中命令之詞非空言可以潤飾
加以支離之悴久辭浩劇之權令所領者益繁顧於力
而不逮苟失量度是謂暗愚伏望皇帝陛下特收渙汗
之恩重擇長材而用仰違要重庶得安全有祿庇身固
能自足懷忠効國誓竭素心

辭免節度使表

郭師禹

抗章避寵無逃擁節之華賜札疏榮益重循牆之愧俞音
尚閔揣已奚堪敬伸螻蟻之誠洊瀆高明之聽臣

中謝

竊以爵為勸賞蓋在厲世之方器以褒嘉尤謹假人之
戒矧渙號敬廷之制而齋壇授鉞之儀非有旂常可紀
之功曷稱明時甚盛之選伏念臣受材謏薄賦性顓蒙
猥忝舊媼濫陞朝著危帶高華之列綴甘泉法從之
聯徒以樸忠每蒙睿簡所朝恪奉曾何益於涓埃琳館

均閑深切慙於尸素深懷滿盈之咎粗堅止足之私敢
謂么微誤膺顯擢晉公杜圭腴之異數昭龍光眷獎之
非常忝冒難勝顛隳是懼伏望皇帝陛下離明委照乾
造無私俯垂從欲之仁收還成渙改畀元勲之彥庶穆
奧言

辭免節度使表

汪彥章

引疾辭榮方幸機衡之解疏恩越等遽蒙旄節之頒慄
如淵谷之臨莫測雲天之施輒布由衷之懇仰干方命

之誅

中謝

伏念臣承學缺如起家寒甚早被聖神之遇

遂參承弼之司黽勉十年周旋二省妨賢最久自知罪戾之盈容跡每安實賴恩憐之至比失衛生之理益懷誤國之憂力丐授閒僅蒙賜可所願退安於散秩敢圖併授以隆名惟齋鉞臨師乃人主待有功之士而祠庭置使亦朝廷優元老之臣顧平時猶懼於素飧豈病質乃堪於徽數伏望皇帝陛下不忘舊物深諒微忠量材能小大之宜盡庇覆始終之意特回渙號靡速煩言未泯

餘生尚可筋骸之強擔堅晚節仰酬體貌之優

辭免都督江淮軍馬表

張德遠

江淮重寄猥出異恩犬馬餘生蓋安微分輒上臣愚之
請未蒙制可之音中謝伏念臣少不如人老將及耄一

士賢百萬之衆素乏修能百里半九十之時仍當末路
倘進退不懲於迷復則鬼神將害於福謙顯惟嘖有之
言重玷并包之度況明光之口雖陳於別塞而赤白之
囊不徹於甘泉分屯已固於長城申命何資於錫鉞伏

望皇帝陛下擴日月之照推天地之恩俯憐視蔭之幾
何時加全護不憚出綸之惟反曲賜矜從

辭免資政殿大學士知隆興表 黃德潤

漉蝼蟻之誠冀回淵聽渙絲綸之布尚閔俞音義不遑
安須至再瀆臣 中謝 竊以陳力就列人臣當自揣諸心

量能授官君上亦必唯其當有如潛藩巨屏秘殿隆名
甚非么微所克負荷而況適茲虛次妙於東求豈無方
面之才以稱當宁之寄鎮撫所係恩意非輕猥以屬臣

敢不祇命重念臣叨竊久矣報塞蔑然雖中外之任不殊而知能所効則一感洪恩之優渥撫小己以凌兢伏望聖明特賜俞允重優賢之典無以妄加念某帥之難必求已試

辭免翰林學士知開封表

蔡君謨

大明臨下無遠裔而不均零露墜霄雖微物而必潤俯承錫命彌用震驚伏念臣向日掖垣擢司京邑上賴清光之燭終依全度之仁屬私便於庭闈遂求補於閩粵

尋膺朝綽出守泉山首尾五年更移兩郡親戚歲時之
樂足慰母心阡塋展省之勤屢躬先祀非為孝治之廣
曷為天幸之多惟臣賤微感疾滋久藥石攻治之愈至
根本堅牢而未除日月因循筋骸憔悴深畏曠官之責
方潛退處之圖伏蒙皇帝陛下曲貸素餐復加恩數禁
林近職儒者最榮都輦要權吏之高選併疏寵渥猥逮
孱庸揣材幹之匪優顧福基之甚薄苟貽過溢之咎實
虧分量之知重念臣仰違法座之嚴薦易周星之次思

出入於省闈每意在於本朝今此召還適當趨進然而
慈親年老於義不可以遠行病體至羸於力不堪其劇
任願特收於成命俾再典於舊封唯是危誠終期得請

進秩

陪位

起復

辭免正議大夫表

天中霈澤近輔書勞亦及罔功宜宜虛受

中謝

伏念臣

素無他技唯繫孤忠誤蒙累聖之知寢復近僚之列頃
因人乏進貳宰司先帝審訓羣臣靡預誓言之末陛下

嗣膺大寶曾無翊戴之勤豈弗畏於多言詎敢當於懋寵矧乃方任人而立政惟即命以記功將深戒於官司宜先從於近始伏望皇帝陛下慎持名器申勸臣隣收出綽之過恩亮循牆之愚懇爵以馭貴免上累於至公賞必及勞蓋率由於舊典

辭免覃恩轉階表

汪彥章

便蕃之寵弗許固辭震懼之懷終難安處敢再輸於危懇庶有際於淵衷

中謝

伏念臣猥自周行獲陪興運未

閱半朞之久已躋三府之崇雖鴻慈務極於生成而小
器日憂於盈滿矧當國步艱難之後茲人臣隕越之時
詎可包羞唯知冒進故屢上縷陳之牘願必還汎進之
階子雖幸於父知天未從於人欲伏望皇帝陛下特垂
簡照無徇彛章念微臣事主者既本至誠則聖主待臣
者何憂不貴肆頒明詔追寢誤恩憐疎遠之孤踪速僭
差之大戾使鵷鷺共由之路循次而升則桑榆未盡之
年皆君所賜

辭免南郊陪位表

王介甫

萬國駿奔焯上儀之殊觀一夫幽屏叨明命之特招伏
念臣竊祿已多冒恩最渥自致惓惓之義實有素情再
瞻穆穆之容豈非榮願而繭然暮景嬰以沈疴伏畎畝
以負薪於今未已侍壇垓而踐豆用此為妨

辭免明堂陪位表

歐陽永叔

合宮大啟爰講於上儀明詔忽頒俾祇於嚴召被恩言
之優渥撫病質以兢榮

中謝

伏惟皇帝陛下聖哲聽

明憂勤慈儉遂羣生而涵育臻至治於和平乃因萬物之成秋爰即几筵而展禮陟降薦獻百官以職而各供膺受福釐一人有慶而咸賴而臣近辭印綬方伏田廬當與庶民並蒙餘澤敢期睿眷尚錄孤孱俾陪在外之臣來預侍祠之列載念臣自緣災疾幸獲退休殆未逾時尚嬰舊苦雖朝廷禮樂之盛得與者為榮而犬馬筋力之衰告疲而已久既不得於策勵姑自信於奇屯太史滯於周南惟知嘆命子牟存於魏闕但極馳情

辭免明堂陪位表

張文潛

明德惟馨方格神於盛禮相予肆祀俄賜召於老臣哀

朽知榮兢惶靡措

中謝

伏惟皇帝陛下嗣隆聖統躬致

太平翼翼文王之小心烝烝虞舜之大孝季秋順序方

萬物之盛多四方和來喜多士之奔走祇見列聖哀對

昊穹敬布政之法宮大明禮樂受丕天之景貺均被邇

遐喜交神人慶浹夷夏凡執事豆籩之末或觀光興隸之

間足為至榮可以無恨而況臣猥以屏退尚叨記存溫

詔在門外庭有位固願聞舜韶而率舞瞻堯日以傾心
而遲暮之餘衰疲且久筋力已消於疾病才冀盡年
踈野久放於田間不足為禮當千秋之接統自滯周南
奉半夜之受釐莫趨宣室無階策勵惟劇飛馳

辭免起復太宰表

代

王豐父

苦塊餘生已濱死所絲綸渙號俾復書班勅使薦臨德
音下迨呼天號絕拊已驚迷伏念臣早偶家艱專承母
訓零丁孤苦邈爾無依鞠躬提攜迨夫有立夤緣際遇

玷冒高華犬馬之養未伸風木之悲遽至攀號泣血摧
踊殞心仰賴聖神之恩甫終窀穸之事几筵是奉墳土
未乾痛深陟屺之瞻恨未及泉之見敢謂宸衷念舊優
詔奪情蓋三年免懷通喪皆聖王之制而踰月視事變
禮豈治世之風雖睿眷之殊常豈私情之所忍伏望皇
帝陛下推孝思而錫類值宰柄以馭臣念哀苦之方深
況衰疲之已甚報親日少願終制以為期事國時長願
捐軀而未晚

辭免起復太宰表

代

方席薪而枕塊於義為安俾服冕而乘軒共知不可哀
情淳布宸聽未回再殫罔極之情冀動蓋高之聽伏念
臣猥蒙天眷誤玷宰司久無補於明時亟自招於大禍
慈顏遽隔悲隙駟之難留原宥再成倚苦廬而永慕庶
畢哀恫之制少酬顧復之恩忽奉制綸俾還相位私情
莫處公議靡容豈可遵故事以蹈前非但當守禮經而
據古是臣罹酷罰屬在衰年既極摧殘浸成疾恙精神

徒耗筋力頓衰雖強使之造朝決難堪於應務伏望皇
帝陛下委大明之照閔不移之愚追寢渙恩俾終祥禪
則聖主得全於禮貌而孤臣獲畢其孝思疾首痛心或
偷生於茲日銘肝鏤肺期報德於他時臣無任

辭免起復太宰表

泣血陳詞仰祈聰聽批章示訓尚閔俞音涕泗無從回
皇失措伏念臣人非適世仕本為親密困官途頗闕晨
昏之奉晚逢真主方欣甘旨之榮俄纏藥棘之悲永負

劬勞之報呼天靡及觸地無容強食勝衣空驚過隙之
駟感時追往更傷反哺之烏敢意敕使薦臨德音嗣降
雖君命召固難俟駕而行念人子情不忍短喪而出矧
今耆老在上忠賢繼登外無兵革之虞內有禮樂之備
事得其序功已告成則焉用於愚臣俾固違其典禮伏
望皇帝陛下大明旁燭至德兼容俾酬慈母之恩俯遂
匹夫之志褒非一字已同華袞之榮誓畢三年庶免素
冠之刺

五百家播芳大全文粹卷三中

欽定四庫全書

五百家播芳大全文粹卷三下

宋 魏齊賢

葉 榮同輯

謝除授表

宰相

謝除右僕射表

王介甫

貳令中臺兼官左省惟時遴選蓋嘗久曠而弗除忽此

叨居顧豈微勞之可稱陪敦厥邑敷告于廷是皆至榮
難以虛辱臣某

中謝

竊以經術造士實始盛王之時偽

說誣民是為衰世之俗蓋上無躬教立道之明辟則下
有私學亂治之姦氓然孔氏以羈臣而興未喪之文孟
子以游士而承既沒之聖異端雖作精義尚存逮更煨
燼之災遂失源流之正章句之文勝質傳註之博溺心
此淫辭設行之所由昌而妙道至言之所為隱篤生上
主純佑下民成能協乎人謀將聖出乎天縱作于心而

害事故斥幾殫通于道以治官廷登既衆尚懼膠庠之
黎獻未昭典籍之羣疑乃集師儒具論科指繕書來上
褒典俯加臣趣操弗高知識尤淺少嘗勤苦但為裴氏
之吟晚更耄衰豈免與人之議初備使令之乏即知稱
愜之難敢意誤恩獨當殊獎此蓋伏遇皇帝陛下以化
民成俗為事故急在誨人以尊德樂道為懷故易于磨
爵因忘固陋特假寵光祇服訓辭深惟報禮雖無博學
對揚稽古之隆名庶以雅言助廣右文之美化臣無任

樞密

謝除樞密表

張全真

視草無聞已玷嚴凝之直出綸甚寵遽陪宥密之謀錫
秘殿之隆名進文階之顯秩循牆固避渙汗莫回中謝
伏自兵威既挫于北敵之強國勢益微于南渡之後衆
類傷弓之鳥將猶飽肉之鷹念郊壘之風塵想籌帷之
豪傑時開真主固有以駕馭于英雄事總天營又有以
統臨乎將帥至于參貳樞極幾亦奉行文書曾是艱難

豈容尸素況如臣者才極下中之品進無左右之容扶
策讀書居慙軍旅之末學莅官行法粗安州縣之徒勞
由誤簡于冕旒遂濫陪于簪橐任論思獻納之寄訖何
補于聰明更文章翰墨之遊但徧塵于親切每憂踰分
屢丐投閒敢謂春禮有加鴻私未慙付以本兵之重試
其經武之長倘非稍効捐糜何以分憂宵旰此蓋伏遇
皇帝陛下撫育萬宇焦勞百為從善如轉圜已兼收于
衆智與人不求備曾罔棄于寸長遂令樗櫟之姿亦廁

機衡之任痛遠人之猾夏終期尺筭之答來群策以防
秋敢怠寸陰之惜尚幾小補以答萬分

謝除樞密表

宋子京

叨膺茂典入莞鴻樞伏省戶以陳章巧締囊之收需危
悚再瀆明制必行慎煩失以致尤輒進思而冒處中謝

臣聞佐王基命簡在臣鄰秉軸居中本之柄兵非有號
令風采為下所瞻則必愒臆謀謨熙天之載異於茲道
孰非曠官竊念臣材散無庸地寒寡援興顏行之下因

得累勞陪周衛之中罕嘗進熟見容漢皇之度久總軒
師之營貳掌繁機佐經中寢會落成之不日因誌祀以
祈天汪濊深仁道迎協氣而臣弗從災異之免更加名
器之多寢嘿懷安委蛇就列內循無狀自詭必酬何月
律之未淹沐天私而載造擢于末級遂正近司輒成奏
以讓還枉深辭之切敕薄言匪控進拜增羞助百姓之
昭明行虞辱國干六符之疎濶舉畏談天茲蓋伏遇皇
帝陛下養以至仁赦其少戇同五帝之親事不及有司

俾一介之孤臣空膺大位敢不益効綿力固伏舊章期有補于萬分敢自紆于九殞

謝除樞密表

宋子京

近叨恩制禪正樞司伏閣上言願還于成命斷章催拜特枉于慈音固讓莫諧冒居何幸中謝竊念臣液樞材散培塿地卑獲對聖明屢蒙柄任敵王所愼既會于偃兵精日之勞何從而塞責洪惟職履深諒由衷斯謀斯猷則罕嘗入告予求予取則不識汝瑕由先帝之舊人貳

禁庭之幾事屬圖考室兼議僭功燕寢乃安顧成並享
紀年四省捨爵計功首膺無虧之言已渙于宣之數借
夫國典布在人言匪謂天眷謬加寵章尤渥靡論彞序
超據上游壅薄訴于危心隔蓋高之善聽光華異等震
扑縈懷三接謚諏未識韜鈴之對萬機嚴翼曷臻密靖之
風乘是泰來缺然虛授此蓋伏蒙皇太后陛下道敷善
養人不備求貸衛綰之譙呵取子顏之謹厚特捐厚
禮期責寸長顧懋賞以不貲誓捐軀而有所

謝除樞密表

代

汪彥章

本柄于中久汙樞機之地進班其首更叨綸綍之恩蒙
睿獎之非常私瑣材而不已安危所繫榮懼交深

中謝

伏念臣生江湖之鄉非廊廟之器偶扞防于牧圉蒙紀
錄于冕旒當中興無文武之才有慙告甫乃一見受腹
心之寄自比留侯薦膺推澤之榮遠處弼諧之任謀叅
帷幄職提輜鈐永言國步之屯方賴廟謨之勝外有交
侵之強敵內多竊發之奸民兩河未復于輿圖二聖尚

勞于岳狩非兵莫濟得士斯昌豈伊章句之腐儒堪此
朝廷之大任茲蓋伏遇皇帝陛下治先稽古志在宅中
躬堯舜之仁惟欲濟民于富壽摠高文之憤不忘克已
於憂勤詳延左右之臣猥及下中之品臣敢不兼收群
策務究遠猷念國家嘗膽之憂適當今日豈臣子捐軀
之報敢後古人

辭樞密表

歐陽永叔

右樞虛府充位宜求于雋賢多士盈庭誤選乃比于庸

妄既牢辭之靡獲徒以寵而為憂

中謝

伏念臣少本賤

愚初無志慮為小人之事力不勝于負薪程有司之文學止期于干祿過被仁恩之樂育早從英俊之並遊遂叨侍從之流久玷論思之地方時求治殆無補于分毫顧質早衰況漸凋于齒髮但思藏縮敢望甄陞矧惟替萬事之機必也極一時之選豈容濫得猥以備員當今命之始行方惶惑以失措以睿恩至渥召旨甚嚴莫諧懇避之誠徒負貪榮之愧此蓋伏遇皇帝陛下廓天地之

量垂日月之光憐樸直之無他謂疲駑之可勉俾承闕
之以効拙勤臣敢不奮厲無能之姿感激難遇之會職
思其位庶免于曠官謀不以身少期于報國

叅政 昭文

謝除叅知政事表

楊大年

臣某言臣近者虔拜封章乞歸班列忽奉手詔不賜允
俞仰睿旨之丁寧撫微躬而戰慄欲更披于肝膈慮有
黜于君親中謝伏念臣孤直寡徒頑疎無取章句之學

僅能齒于諸生清白之規固克傳于奕世自策名筮仕
陳力當官塵右掖之清華踐內庭之嚴秘乃至典樞機
之務叅輔弼之司並由疏冕之誤知豈副縉紳之公議
小器應難于大受高位惟恐于疾顛夙夜在公雖黽勉
而從事負乘致寇亦跼蹐之靡遑今者訟起下民辭連
執政憲府職當于推鞠獄情遽至于矯誣既閱實以平
反爰舉直而錯枉已從明辨式正常刑其如中司長官
是臣外舅踐文昌六卿之貴昧圜扉兩造之辭名挂簡

書身繫非所實朝倫之共恥在戚屬以何顏是用漉懇
紫庭祈恩丹宸願退歸于散地庶允洽于至公豈謂皇帝
陛下推洪覆之深仁示曲成之玄造特頒泥檢俯示綸
言徵周書之舊章以其罪不相及推漢高之大度且復
待之如初仰承雨露之私內積永淵之懼瀆尊之罪固
不可以再三許國之心但益堅于方寸誓傾臣節上答
天慈臣無任

謝除叅知政事表

王瞻叔

備爭臣而諭旨蔑著顯庸躋政地之出綸驟膺親擢控
誠忱之懇切辱訓誥以頻煩拜命若驚省躬甚惕

中謝

竊以虞舜紹唐堯之緒五臣舉而至治章武王恢周室
之基十亂升而大勲立惟輔理需人非一賢之略必同
寅共濟廣衆正之求矧今三邊未寧庶事多舛民生尚
困國是易搖天災時變之占日深寅畏旰日宵衣之慮
特軫憂勤陛下妙簡臣鄰旁招俊哲列之丞弼責以謀
謨蓋將外撫四夷內脩百度振藝祖創垂之統酬光克

付託之誠自非兼文武之弛張效忠嘉之啟沃學據古
今而通其變才周軍國而措之宜則何以上贊宸猷下
符僉論如臣者斗筭小器鉛槧腐儒徒以險阻艱難之
備嘗稍諳俗狀故于東西南北之不擇自勵功程久絕
望于榮途復何心于晚節向者召從巴蜀歸覲闕庭初
無左右之容遽被神明之照未更一歲殆及九遷版部
銓曹綴獻納論思之末禁林諫苑充文詞言語之官皆
暖席之未遑已抗旌而于邁心欲為而不逮者精力勞

則有而何補于事功遲休榆塞之防秋便老菟裘而卒
歲敢期僥倖乃爾超踰除二府之自外方追慶歷名臣
之殊遇由七人而叅大政實本朝累世之罕聞萃此寵
光若為負荷茲蓋伏遇皇帝陛下聖聰旁達睿斷無疑
昭讒譖于七政之明定許予于四時之信祇承于帝思鋪
張不世之休無競惟人每夢想非常之士遂令猥瑣亦
玷登庸臣敢不鞭策疲駑支持衰病仰體丁寧之旨對
揚特達之知際會風雲方快覩亨嘉之會奉承教令期

贊成宏遠之規

謝除叅知政事表

歐陽永叔

替貳國鈞叅聞廟論謂宜不次而選冀得非常之材迺
以叙遷俾之承之誤恩過被訴讓靡從中謝伏念臣少
迫賤貧偶勤學問儒者博而寡要況匪多聞文章世之
空言豈能適用徒以早邁亨嘉之會驟蒙獎擢之私叨
言語侍從之流逮今踰紀玷出納樞機之任初乏可稱
幸先彈理之未加每欲逡巡而引去敢期睿眷俾與政

機優以寵章進其爵秩望非意及榮與憂併此蓋伏遇
皇帝陛下克德聰明禹躬勤儉博求俊乂以濟治康謂
臣既樸且愚必能循于忠謹雖庸而懦尚可策其疲驚
猥以備員遂茲冒寵敢不益堅素守自勉日強惟殫犬
馬之勞上答乾坤之造

謝除叅知政事表

王介甫

承弼之任賢知所難顧惟缺然何以堪此仰膺成命弗
獲固辭

中謝

竊以古先哲王考慎厥輔皆有一德用成

衆功伏惟皇帝陛下含獨見之明踐久安之運甫終諒
閣將大施為宜得偉人與圖庶政如臣者徒以承學粗
知義方本無他長可備官使退安私室自絕榮途既負
採薪之憂固逃竊位之責大明繼燭正路宏開付以藩
宣還之侍從清閑之宴或賜開延淺陋所聞每蒙知獎
以為奉教庶幾無尤當軸處中良非所稱龍光曲被震
媿交懷此蓋伏遇皇帝陛下德茂旁求志存遠舉隆寬
盡下故忠良有以輸心公聽並觀故讒慝不能肆志矧

睿謀之天縱方聖治之日躋思稱所蒙敢忘自竭遠猷經國雖或媿于前脩直道事君期不墮于素守

謝除昭文相公表

王介甫

承流宣化方虞失職之誅經體贊元更誤選賢之舉

中

謝

臣竊惟人物之會通常寡實以君臣之遇合至難自

匪同聲氣之求孰能偕功名之享伏惟皇帝陛下天縱大聖人與成能乘百年久安之機飾千載積壞之蠱士誠服矣而持祿養交之習未殄民允懷矣而樂事勸功

之志未興近或困阨而仁義之澤未流遠或虛憍而道德之威未立宜選于衆舉格于皇天之材使暨乃僚纘迪我高后之事冀勝所任以濟斯時而臣早見知于隱約之中久獨立于傾搖之上勲庸弗效恩禮更加託備外藩俯鄰暮歲遂叨詔獎還冠宰司自視羈單所懷蹇淺方古耕築則有其陋為世聘求則無其賢然以投老之軀而遭難值之運苟貪歲月趣就涓埃且上之施既光則下之報宜厚與之戮力仰承睿知之臨罔不同心

俯賴忠良之協誓殫疏拙圖稱休明

尚書侍郎

謝除吏部尚書表

顏思魯

吏曹兼組僅輸累月之勞帝宸疏恩遽陟三銓之首居
然就職惕爾懷慙臣某

中謝

伏念臣初無適時可用之

才徒有泥古不通之學握從臣之索俯仰四方使老上
之庭往來萬里歎賢勞之何有荷聖眷之過優既叨小
宰之除復攝冢卿之乏而臣技窮能薄景迫年侵涖騰

告老之章未動蓋高之聽敢圖簡記反使甄陞維天官
分典于銓衡而常伯實提其綱領頃常兼掌猶懼弗勝
茲命顓官益虞非據併賜身章之寵仍頒廢乘之珍顧
異數之駢蕃將何功而稱塞茲蓋恭遇皇帝陛下規模
天大睿知日躋照臨博暨于群工禮遇尤先于近列知
臣樸忠有守寒松不改于凋年憐臣氣力未衰老馬或
諳于故道迺頌茂渥猥及微蹤臣謹當仰體隆私益堅
晚節壯心雖在詎敢有愛于糜捐來日無多終願祈求于

閒退

謝除禮部尚書表

王簡

外間暫分遽歸于驛召昨朝甫對即擢長于春官席

寵逾渥撫躬增懼

中謝

伏念臣奮身孤遠逢世盛明仕不

因人終始皆蒙于睿簡才非適用夷險但信于愚忠去

國倚廬起家臨鎮豹尾隔四年之從麟符專一道之權

問田里之嘆愁且知疾苦頒詔祿之寬大方究撫綏敢

圖宣室之興思誤玷中臺之率屬跡陪鵷鷺恍疑夢寐

之回履上星辰頓覺瞻依之近被服章之安吉引駒轡
之閑馳榮渥併加微軀難稱茲蓋伏遇皇帝陛下亶聰
建極知哲能官聚英雋以尊朝蓋為本根之慮咨直清
而典禮不徒玉帛之云退省迂儒昌膺妙選臣敢不益
堅素守仰副隆知顧惟斗喉舌之司當勤出納如稽古
禮文之事敢廢討論

謝除刑部尚書表

歐陽永叔

職清書殿實為儒者之榮望峻天臺仍忝刑官之重內

循謗薄仰玷光華

中謝

伏念臣稟質迂愚粗知業履因

時幸會遂叨寵靈無拾遺補闕之勤常陪法從非大冊
高文之手久廁翰林晚綴宰僚俾聞國論荷三朝之春
遇每察懦衷幸四海之清平得容尸祿居滿盈而不戒
積災釁以自貽屬聖統之嗣興赫皇明而繼照誣言詰
服已大釋于羣疑危跡俾全保不虧于素守犬馬合思
于報効桑榆奈迫于衰遲屢貢懇私上千聰睿遂蒙開
允俾解繁機然而晚節餘生本期被寵清資顯秩益更

貪榮被優渥之非常但凌兢而失措此蓋伏遇皇帝陛下聖神御極亭育推仁憫孤拙之勢危無容自立謂疲駑之力竭難責遠圖曲軫至慈俯答誠請仍憐舊物特示殊恩顧非木石之頑宜識乾坤之造颯然素領雖強束于筋骸皎若丹心猶自期于塵露

謝除吏部侍郎表

歐陽永叔

驟膺渙號備瀝愚誠雖至辭窮罔避煩言之為黜重乎
令出莫回成命于已行祇受以還驚惶失節中謝伏念

臣學不通于原本材不足于經綸但知守拙以為忠每
務師心而自信徒以遭逢先帝拔自衆人猥參侍從之班
遂玷機衡之貳而屬大橫啟運嗣統膺期方初政之清
明思百度之脩理內量謏薄實憂以聖而責愚矧迫衰
殘方念乞身而告病不謂皇慈曲被寵數屢加當覃大
慶之初已無功而冒賞曾未踰年之久復進秩以叨榮
此蓋伏遇皇帝陛下聖政惟新用人務廣謂才難于求
備思悅使以忘勞憫其勤劬錫以優洽雖榮踰于望表

亦寵與其憂并誓殫犬馬之微少答乾坤之造

謝除戶部侍郎表

蘇子由

掖垣清閑奉鈐槩以偷安民部劇煩以錢穀而為職事
非素學命不獲辭中謝伏念臣起于南裔曾未再期擢
在近班訖無少補開口論事適宸心延納之初引筆代
言非書命縱橫之際竊祿而已功何足云計日以言時
亦未幾方自憂于汰去豈復意于超升此蓋伏遇太皇
太后陛下仁聖無為靜深照物坐閱工師之衆灼知情

偽之端察臣朴愚憐臣孤遠才雖未能以應務性則不喜于為邪試之劇曹冀其來效然臣觀當今右部之政正直昔日新法之餘召募憂于殘荒差徭患于戶少事雖難辦法當通方尚賴聖算之明稍寬民力之憊臣之踈拙徒自勉強苟少綏于瘡痍亦圖報之萬一

謝除戶部侍郎表

晁无咎

典三禮于曲臺已冒高華之選貳六卿于民部遽登峻近之班力陳祈免之忱辭終奉莫回之溫詔爰賜九環

之帶仍頒列采之衣寵賁具蕃凌兢失措中謝伏念臣
初無時譽獨有家聲莫傳屋壁之遺編僅繼山林之末
續好為異論每與世疎喜作文章務求古合低徊平進
坎坷數奇事鈐槩于書林樂絃歌于學省曳裾而位王
傅佩玉以陪禮官乏牋奏之體而掌端錦于南宮非應
接之才而駕軺車于北道寅緣賜對懇切獻忠明言趙
魏之郊寇攘孔熾極論幽燕之域疆場弛嚴謂新民右
祖之可防由勅敵左衽之不變荷上皇之嘉納仰聖度

之優容偶逭邦刑亟遷宰旅徒悉心于綱目曾何補于
彌綸圍城之變忽生造膝之言良驗自罹兵革益困簡書
心志摧頽形神凋耗獲辭劇任復處清流因贊道而覩
二聖之重歡預計論而創兩宮之新禮國步稍定私志
或伸念八載之居中丐一麾而補外居叨異數俾踐禁
途超跳等夷愧負流輩惟常平之美號本廣惠之舊規
加損益于前朝浸乖墮于今日儲蓄竭公私之橫費新
陳棄散斂之虛名方師旅之未寧慮水旱之或繼田廬

戕毀以幾盡老稚流徙而不歸要當貸而不償是謂積
而能散極茲錮弊宜屬峻良蔑聞下才克堪重寄此蓋
伏遇皇帝陛下天臨九有子育群黎攬英俊之奇謀共
殫初載監宗祖之成憲圖致中興念臣專意藝文蓋將
試以吏治察臣粗知體要或可備于從官臣敢不仰稱
所蒙俯脩厥職錢穀之問其不至于廟堂補助之仁願
廣推于寰海雖簿書期會之是務豈論思獻納之敢忘
披黃卷以接聖賢願尚存于舊習賜金魚而因政事竊

自比于昔人

謝除戶部侍郎表

歐陽永叔

皇明繼照如日之升睿澤霽流溥天咸被時惟朽懦亦玷光華中謝伏念臣本以庸虛僅知學問識不周於往行材莫逮乎中人方其壯年喜論時事名聲濫得招謗咎以偕來榮寵踰涯蹈憂危而亦至晚被先朝之誤獎俾陪二府之後塵居無補于休明方自期于引避遽號弓而結恨雖殞體以何追伏遇皇帝陛下奮發乾剛嗣承

天統當茂業繼文之始乃謳歌歸啟之初宗社獲安人
神洽慶矧惟新之號令方無間于幽遐顧於茲時其敢
獨異俯從祇受但益凌兢臣敢不勉勵衰殘感遇今昔
更竭疲駑之效庶伸塵露之微

謝除禮部侍郎表

張全真

病衰自別念無補于艱危睿眷兼容尚叨塵于嚴近循
牆不獲躋地難勝

中謝

伏念臣竊第于上皇臨御之初

久服勞于州縣賜對于陛下中興之旦遂叨侍于冕旒

海充耳目之官圖竭股肱之力愚非一得窮有百罹精神疲于思慮之煩疾悴甚于驚憂之後乃致顛天之懇仰丐投閒敢懷擇地之私但期逭責逮辭榮于專席乃承乏于貳卿將使論思則已試罔功復有曠瘵之懼止充員品則于時多故豈無尸素之慙具瀝危衷繼申前請敢謂包荒之度時寬犯上之誅傳溫詔之褒揚曲煩近弼察寒蹤之孤藐留寘本朝仰厚惠之不貲揆初心而有覲強顏就列力疾造廷伏遇皇帝陛下駕馭英豪而

大有為拔去凶邪而罔不服優容臺諫廓通遐邇之情
眷禮臣鄰曲盡始終之遇顧茲藐質亦玷鴻私念正人
端士之言書紳自勵報厚地隆天之施刻骨為銘

謝除兵部侍郎表

汪彥章

東省瘵官方祈病免中臺分掌乃誤優遷資逢世以非
宜寵踰涯而益懼中謝伏念臣江湖遠裔章句小儒才
不過庸僅及下中之品學雖忘老安知左右之原偶陪
多士之升幸備公朝之選徧沔清員遂綴邇聯旋遭值

于干戈獲奉承于羈勒才因事見初無橫草之功災與
衰期乃有負薪之疾屢投誠于魏闕將歸卧于漳濱猥
蒙內史之書俾貳文昌之秩戎昭所繫儒緩奚堪茲蓋
伏遇皇帝陛下睿智有臨憂勤無逸光復祖宗之舊既
已配天兼收文武之長未嘗愒日唯臣瑣質負國明時竭
股肱之力而徒有此心擘腹背之毛而何裨于用耗縻
廩食羞愧神明不辭勉効于秋毫顧恐溘先于朝露周
六典治庀之職雖幸叨居漢九卿賜告之恩終期得請

謝除兵部侍郎表

呂安老

荷恩深厚撫已驚慙

中謝

竊以六部貳卿九重從別非

耆老久次不任倚毗唯師友淵源知堪獻納況屬艱危
之運而躡英俊之躔士以為榮人所宜重如臣者至愚
極陋多質少文抗志雖慕于古人周已不逮於時輩徒
襲舊學嘗聞師言以謂君子之仁貴克己以濟物至若
人臣之義在尊主以庇民有志于道德則功名自來無
負于國家則爵祿可享事在勉強奉以周旋顧險阻之

備嘗守迂愚而自信頃從疎逖數冒親除當言責於渡江再造之初奉使事於羣盜紛起之際出入帥閫陪大將以宣威入綴省聯佐弼臣而布治坐閱歲時之久蔑聞尺寸之勞方草疏以投誠覬請郡以自效豈期僥倖有此超躋此蓋伏遇皇帝陛下道法祖宗功加寰海思起大化辨邪正以審官務抑虛名分怠勤而察吏知臣不善于諂媚謂臣稍歷于劇煩故畧其愚欲試以用受知如此論報謂何臣敢不仰服訓詞益堅素履深企志

士殺身以成仁忍效鄙夫既得而患失

謝除刑部侍郎表

任文薦

伏奉御筆除臣刑部侍郎尋具狀辭免蒙降詔不允者
坐謫南州猶佩左符之寵歸瞻北闕載頒細札之優顧
遭遇之踰涯但戰兢而出涕

中謝

伏念臣學由總角仕

已畢顛姑務竊祿以安貧詎識取塗而據要薦膺簡拔
皆越等夷成均教導之官初慙虛受法從論思之地亦
輒冒居天地之施無私螻蟻之誠曷報未知死所敢望

生還昨者封疆與賊為鄰保伍科民督戰先擒賊將稍振軍聲設險則高壘深溝濟師則飛芻輓粟寸心勞瘁左臂病癢方願投閑遽蒙趣召茲蓋伏遇皇帝陛下軫憐舊物開示大公察其遜至之勤宜有遵父之節試中執法既收無用之言擢以司刑更責後來之效臣敢不益思許國毋憚殺身第虞衰疾之侵終遂退休之請

謝除工部侍郎表

秦少游

入司太僕已慙稱效之虛進貳冬官尤媿選掄之誤顧

叨塵之已甚念辭避之弗容承命惟驚撫躬以懼中謝
伏念臣身承家訓世受國恩荷先朝特達之知蒙二聖
生成之賜左選都司之要既獲備員內閣秘殿之嚴更
容通籍以至外專兩郡內閱三卿徒為歲月之淹莫先
事功之學方虞罷黜退伏于田廬敢意推遷遽陪于法
從材微任過恩重報難此蓋伏遇皇帝陛下威德海涵
至仁天覆以臣父某歷四朝而被遇登三事以退居知
父子至情欲慰桑榆之景念君臣難遇兼收管蒯之材

豈惟一敝族之榮時乃百執事之勸臣敢不鞭策駑蹇
淬勵鈍頑以捐軀報國之誠為竭力事親之義


謝除男工部侍郎表

邵公濟

下臣備位未施橫草之勞賤息蒙恩驟綴持荷之列更
煩溫詔莫遂牢辭仰戴寵靈俯深感涕中謝伏念臣家

聲寥落門望單平高曾繼世決科迄陸沉于州縣父祖
同時抗賊咸身沒于邊陲敢期草芥之微迺際風雲之
會起家事主歷時俄冠于孤卿教子讀書接踵亦登于

省寺超踰若此人其謂何反復思之今不翅足荷聖恩之隆厚被親擢之光榮叨塵起部之聯密勿甘泉之侍舉族相顧共知雨露之偏隕首為期曷稱乾坤之造茲蓋伏遇皇帝陛下慎持八柄允釐百工有求忠臣于孝子之門使奏薄技于從官之內必當其位師師言具于羣材亦及爾私瑣瑣或塵于臚仕肆令么麼獲玷清華臣敢不祇服訓詞相勉忠義仰祁奚舉子之意曷繼前脩慕孤寔事君之言少圖後效庶殫皎報用答鴻私



五百家播芳大全文粹卷三下